

四庫全書

集部

欽定四庫全書

集部

明文海卷六十五

詳校官編修臣錢懋

主事銜臣徐以坤覆勘

總校官庶吉士臣倉聖脈

校對官中書臣范來宗

謄錄監生臣左熙世

欽定四庫全書

明文海卷六十五

餘姚黃宗義編

奏疏十九

直陳三大可惜四大可憂疏

華允誠

臣最驚下濫更清秩固守拘諒無裨聖明昨以母老乞
休情迫呼天罔知違例特蒙聖慈矜宥感激涕零中夜
循省既無寸長可以自效若復耽榮思禍依回容默有
懷不吐君親兩負何以為人竊見三四年來皇上焦勞

於上羣工百執事鞅掌拮据於下匆匆孜孜日不暇給而法令滋章臣民解體人材蕩盡根本受傷此臣所謂可惜可憂者也以皇上聖德加之厲精何難手握大權坐躋至治乃當事諸臣借皇上剛嚴而佐以舞文擊斷之術借皇上綜核而騁其訟逋握算之能遂使和恒之世競尚刑名清明之躬浸成叢脞以皇上圖治之盛心為諸臣鬪智之捷徑可惜者一人臣典幹展采止此精氣今但以窺矚微指為盡心抉擿細故為快意乃至率

屬大僚驚魂於回奏認罪封駁重臣奔命於接本守科
直指風裁徒徵事件長吏考課惟問錢糧遂使官守言
責止歸牒牘之繁吏治民生盡成鉤較之務以多士修
職之精神為小夫趨辦之能事可惜者二今何時乎非
大小臣工同舟遇風之時乎而廟堂不以人心為憂政
本不以人才為重四海漸成土崩瓦解之形諸臣但有
角戶分門之見意見互觭議論滋煩遂使倮剝倮撫等
於築舍忽用忽舍有若舉碁以興邦啓聖之日時為即

聾從昧之舉動可惜者三人主所以總一天下者法也
今雷霆所及幾莫知其方矣喪師誤國之王化貞何以
與楊鎬異辟潔已愛民之余大成何至與孫元化並逮
甚而一事偶誤一言偶拂執訊隨之反使輕猾者不以
扞網為懼而矜矯者且以對吏為榮刑罰不中鈇鉞無
威可憂也國家所恃以為元氣者公論也今直言敢諫
之士一鳴立斥指奸薦賢之章非訐則黨不惟不用其
言并錮其人不惟錮其人又加之罪遂使諸臣相戒拱

默啞塞求容是非共蔽忠讒互淆可憂也國家所賴以
為防維者庶恥也今大臣握重權大官而有徒隸之心
小臣惟望氣占風而鮮特立之概近者中使一遣妄自
尊倨與之抗衡者僅二三人耳其餘奔走期會惟恐後
時詰曲趨承猶虞獲戾皇上以為近臣可倚而不知倖
竇已開以為內臣可惟吾操縱而不知其屈辱士大夫
已如此矣貪競成風羞惡盡喪可憂也國家所藉以進
賢退不肖者銓衡也古者丞相之職實兼今之閣部權

大重而易以為奸國朝罷設丞相於是用人之職吏部掌之而閣臣不得侵焉今閣臣兼操吏部之權而加膝墜淵惟其所欲以朝廷黜陟而供報復之私會推公典兩手握定而私人徧布勢日傾乎南北封疆重寄一味游移致覆轍相尋憂獨遺於君父甚至庇同鄉則逆黨可公然保舉而白簡翻為罪按排正類則講官可借題逼逐而薦劾遂作爰書皇上惡諸臣之欺欺莫大於此矣皇上怒諸臣之擅擅莫專於此矣皇上厭諸臣之黨

黨莫固於此矣威福下移而舉錯倒置奸焰薰灼而正氣消磨可憂也臣區區之心願皇上尚德緩刑用賢去佞勿以至神至聖之資為臣下所誤勿以治人治法之大為奸回所牽勿過用嚴而使士氣人心日趨於頑懦勿偏為任而使名流善類永錮於清時使臣言得行即治臣以出位僭言之罪臣有餘榮即臣母亦無遺憾矣

請贈官三孝廉疏

陳子壯

題為微臣巡方事竣敬舉真忠節真孝廉仰祈聖明鑒

裁賜謚贈官以勸忠臣以維士習以彰聖化事儀制司
案呈奉本部送崇禎七年十月初十日禮科抄出巡按
蘇松等處監察御史今降職五級祁彪佳題前事內稱
朱紉長洲縣人生三日遘家難即與其母繫獄後賴有
司白其寃稍長為諸生孤苦自立正德間成進士知景
開二州俱以廉惠幹濟稱擢南駕部備兵四川威茂時
以平深溝諸部寇功歷廣東左布政使又以剿平獍賊
進都御史撫南贛移撫閩浙時沿海奸民與番舶通因

緣為奸利而以大姓豪家為主紈拜官請便宜從事及
視事斥去貪污者數人窮治通海舶者批根豪右剪除
無貸提兵平漳州同安寇移師定海屢破島夷又大破
賊於溫盤南鹿諸洋以忤時數上捷僅得一拜賞後悉
平佛朗機黑白二番舶俘其首及餘衆四百餘有言其
為變者紈下令誅渠魁為言者誣劾削職聽勘紈讐嫉
墨吏大猾以為必死嘆曰吾家無一錢且數負氣節安
能對獄吏遂仰藥死陸梁長洲縣人連科選庶吉士以

不謁謝權貴遂出為工科給事中感激受命三日聞邊警即上言兵事又請開弘文館與博聞有道之士講論政事優太學舉貢諸生途與進士並復上四事曰久任使慎考察汰冗官復制科言事無所避忌時法司與廠衛獄互異槩力持法司議遂下獄踰月杖而釋之復劾輔臣張孚敬桂萼并及諸要路夜草疏鬼嘯於庭槩大言曰我男子死耳疏不可已嘯乃寂疏入罷二輔臣直聲震動會有以蜚語聞者復下獄謫都勻驛丞遷永新

令平冤獄擒劇盜杖殺土豪以母老致仕歸十八年不通朝臣一字郡邑罕覩其面葉茂才無錫縣人生而孝友痛母早逝每館歸坐卧父側時刻定省萬曆己丑成進士授刑部主事三月告南迎養改工部分權蕪關盡革他稅不留一錢差竣上羨金數千疏曰久早得通故有羨金請不為例蒙賜白金松布以旌異改南吏部郎中再請告歸起禮部郎中歷陞太僕寺少卿家十五年至是始一出時言者議論異同抗疏相關且累疏乞休

又七年起太僕太常少卿皆不就陞南京工部右侍郎
到任三月即致仕布衣蔬食以終其身居僅有堂三楹
妻安人老而織紡以給饘粥及與同志講論道德切磋
不倦無片紙入公門雖小夫稚子無不知其清節張基
吳江縣人中嘉靖庚子舉人例得坊金散宗黨略盡會
試時有顯者欲為道地堅謝弗應是年擬魁選竟爾落
第父卒孝事祖母上南宮時忽念祖母病遽爾返棹自
是遂謝應舉究心為己之學所著有孝經附註讀書疑

獨鑿廣頤數十卷隆慶初詔采山林隱逸撫按彙薦力
辭不應歲大侵賑米數百斛屬軍興族皆任役不忍獨
以例免為請代於官毀家紓之產盡弗顧學既有得預
刻亡日至期趺坐而逝歸子慕崑山縣人中萬曆辛卯
舉人為文苑名臣有光子少喪父讀遺書必捧之而泣
母疾衣不解帶者數月少具勝情若不可一世及有得
於晏坐默存之學其學專於訟已過若創痍刺心毫不
假借以是遘疾嘔血雖制義妙天下竟絕意進取不與

衣冠之會不詣府縣不受當路問餽不為子弟應試干請雖甚貧養其兄子之孤者養其弟婦之寡者自處無不得之言與人無不足之色里俗皆化之甫強仕以前疾卒朱陞宣吳縣人中萬厯壬子舉人念父母老一再公車往返不踰百日乙丑心動馳歸歸則父九十尚無恙而母氏甫七十康養旬餘遽卒識者謂誠孝所感自此遂絕意計偕設榻疾父之側凡一菜一糜以至中單廁踰之類靡弗親者與先臣周順昌為總角交順昌中

瑯禍時小民號呼稱寃徂擊緹騎閭郡震恐多避難獨
陛宣周旋於左右後以親歿拮据喪事不得辦致患噎
膈卒以身殉孝門下從遊百餘人多一時譽髦會繪之日
相向哭失聲已上在忠節三臣勁骨不容膚功早建孤
忠九死回天之諫草猶香恬退一生獨對之衾影無愧
在孝廉三臣學修已底純全志行毫無餘疚高文懸市
士人皆挹其丰神至行飭躬賢者獨欽其蘊藉是真輿
論允合國人曰賢者也伏乞聖明鑒裁勅部覆請忠節

者賜之謚典孝廉者贈以官階奉聖旨該部知道欽此
欽遵抄出到部送司除朱紉等賜謚應俟諮訪另議外
其張基等贈官一節查得往例以撫按薦舉由孝廉蒙
恩授官者如萬曆二十一年正月江西舉人劉元卿授
國子監博士鄧元錫授翰林院待詔萬曆二十一年二
月四川舉人來知德萬曆三十八年十月湖廣舉人瞿
九思並授翰林院待詔俱奉欽依在卷夫同一舉人生
者之潛德既行旌叙則死者之幽芳似更宜優卹事例

固可援也等因案呈到部看得蘇松巡按御史祁彪佳所舉孝廉已故舉人張基歸子慕朱陸宣三人歿有久近其行事亦有互異而大都孝以為經文以為緯讀書明理守身事親皆有志於古人而無同於流俗鄉里共高其誼紳衿咸以為賢者宜按臣之聽採而臚舉以請也案查舉人繇薦授官往例具在未有贈職於身後者國家名器固所當嚴乃其人往矣非有月旦之依附徑路之汲引也其光燄不足以熱人而直道不泯潛德猶

卷六十五
芬擬授官之典於論定之餘似為較愜伏惟勅下吏部
照劉元卿鄧元錫等例各贈一官銜以為好修者勸益
於三舉人身後所得者不過虛名而於今日士風世教
所裨者即為實效矣伏惟皇上裁奪施行

糾內臣檄謁疏

金鉉

奉為監臣移檄非體微臣瑣言漸驗伏乞聖明立賜申
飭以全士節事臣於十月二十三日具疏懇止總理太
監建署蓋惟恐以此開交結之漸決庶恥之維所爭甚

大非止為糜費無益也臣靜候綸音不蒙批發未幾而
建署之舉卒行矣此在聖明自有裁制臣不敢補牘強
聒乃昨見臣部司務應傳總理太監張彞憲信牌內開
本監公署已完擇於初七日上任所有兩部司屬官吏
人等謁見一應儀注合照部堂體制會同斟酌妥當逐
欵詳開先期呈報臣見之不勝驚異夫彞憲之遣皇上
原使之監視兩部出入錢糧未嘗假以堂屬相臨之體
也今彞憲移檄曰司屬曰合照部堂體制是明欲驅清

署之臣羣然屈節於菴寺試令彛憲自思皇上勅諭中
曾有是乎抑祖宗典故中曾有是乎且彛憲銜猶司禮
職則監視原與巡視之體制相等惟是貪墨侵欺一任
覺察若必欲亢顏昧心妄自尊大以皇上迪簡之臣子
而令其磬折偃僂將置自有之堂屬別行僭妄之儀去
不易之公庭強抑刑餘之下則彛憲殆儼然以卿貳自
命其意不知以何者處諸臣矣不亦羞朝廷而辱當世
之士耶況從此結納奔趨彼則日驕此則日諂干憲典

而壞士風有如臣前疏所云者其流弊可勝言哉臣委質聖明自矢無玷生殺予奪惟君父命決不敢匍匐於彛憲雄踞之庭致罹交結之條也伏望皇上俯採臣言立勅彛憲勿謬以部堂之體自居并飭兩部諸臣勿輕以司屬之體自褻公署雖置決宜絕跡不相往來止以錢糧文冊移會稽核庶國體正而士風伸矣臣無任惶悚待命之至崇禎四年二月初六日具奏初九日奉聖旨內臣總理錢糧各官遇有職事相關自當禮見其餘

不必通謁金鉉亦不必借題激陳該衙門知道



明文海卷六十五

欽定四庫全書

集部

明文海卷六十八至

詳校官編修臣錢樾

總校官庶吉士臣倉聖脉

校對官中書臣石鴻漸

謄錄監生臣姚希慶

謄錄監生臣包文訓

欽定四庫全書

明文海卷六十六

餘姚黃宗羲編

詔表一

定嶽鎮海瀆名號詔

王禕

詔曰自有元失馭羣雄鼎沸土宇分裂聲教不同朕奮
起布衣以安民為念訓將練兵平定華夏大統以正永
惟為治之道必本於禮考諸祀典知五嶽五鎮四海四
瀆之封起自唐世崇名美號歷代有加在朕思之則有

不然夫嶽鎮海瀆皆高山廣水自天地開闢以至於今英靈之氣萃而為神必有受命於上帝幽微莫測豈國家封號之所可加瀆禮不經莫此為甚至於忠臣烈士雖可加以封號不惟當時為宜夫禮所以明神人正名分不可以僭差今命依古定制凡嶽鎮海瀆並去其前代所封名號止以山水本名稱其神郡縣城隍神號一體改正歷代忠臣烈士亦依當時初封以為實號後世溢美之稱皆與革去其孔子明先王之要道為天下師

以齊後世非有功於一方一時可比所有封爵宜仍其舊庶幾神人之際名正言順於理為當用稱朕以禮祀祀之意故茲詔示咸使聞知

進書表

胡廣

伏以六經之道昭如日星經緯乎天地貫徹乎古今放之則彌六合卷之則退藏於密用之於身而身修行之於家而家齊推之於國而國治施之於天下而天下平蓋世必窮經而後道明未有舍經而能治理者也是以

聖王垂憲必資道以開人賢哲肇基必稽古以作範故
伏羲則河圖而演畫大禹因洛書而錫疇孔子刪詩書
修春秋寓一王之法周公陳王業制禮樂弘百世之規
況乎精一執中之傳尤重丁寧告戒之旨如斯顯跡昭
然可觀自王道既衰異說蜂起燔烈秦火之餘穿鑿漢
儒之弊其間存者不絕如絲莫能究其指歸一切趨於
苟且夤緣故習鮮克正之於乎聖人之道不行而百世
無善治聖人之學不傳而千載無真儒遂令往轍之難

尋益發前修之永歎夫否必有泰晦必有明繇夫濂洛
關閩之學興而後堯舜禹湯之道著悉掃蕪蕪之蔽大
開正學之宗不幸屢阨狂言即揚復抑又因循數百年
之間卒莫能會其說於一蓋必有待於今日者矣天啓
聖明誕膺景運太祖高皇帝天縱之聖以武功定天下
以文教興太平首建學校頒賜書籍作養人材茂隆政
治四海內外翕然同風欽惟皇帝陛下文武聖神聰明
睿知繼承大統紹述鴻勳成功盛德雖三皇而無以加

事業文章與二儀而同其大治已至而猶以為未至功
已成而猶以為未成體道謙冲遊心高遠乃者渙起宸
斷修輯六經恢拓道統之源流大振斯文之委靡發舒
幽蹟鉤纂精玄博采先儒之格言以為前聖之輔翼合
衆途於一軌會萬理於一原地負海涵天晴日暎以是
而興教化以是而正人心使夫已斷不續之墜緒復屬
而復聯已晦不明之蘊微復彰而復著肇建自古所無
之制作續述自古所無之事功非惟脩覽於經筵實欲

頒布於天下俾人皆由於正路而學不惑他岐家孔孟
而戶程朱必獲真儒之用佩道德而服仁義咸趨聖域
之歸頓回太古之淳風一洗相沿之陋習煥然極備倚
歟盛哉竊嘗觀之周衰道廢汲汲皇皇以斯道維持世
教者惟師儒君子而已未有大有為之君能倡明六經
之道紹承先聖之統如今日者此皇帝陛下所以卓冠
百王超越千古者也臣廣等一介書生粗知章句大學
賢關渾未造其間與圓冠句履固慙列於章縫幸逢熙

洽之時謬忝校劇之任每受成於指教亦何假於施為
樂觀就編曷勝歡慶與天下而同惠於萬古而有光尊
所聞行所知求不負於教育正其誼明其道期補報於
昇平無任瞻天仰聖激切屏營之至謹奉表隨進以聞

擬進大明一統志表丘濬

伏以並日月以照臨千載啓大明之運全天地所覆載
萬邦咸正統之歸輿圖之廣曠古所無地志之成於今為
盛粵自三才定位歷代迭興封山濬川舜肇十有二州

之地列爵分土周會千八百國之君迨夫嬴秦始置郡
縣繼以劉漢益拓土疆自魏晉以來由宋元而上或閏
位之弗齒或霸業之偏安或威令之阻行或恩德之未
洽皆未有若我朝得國之正闢地之大者也德與地而
兼廣政與教以並行南都吳北都燕立標準於四極大
為府小為縣總要會於三司藩府分封並峙維城之固
衛所布列廣宣禦侮之威規制周嚴氣勢聯屬南踰銅
柱東越鯁波盡入版圖之內西亘金河北彌狼望率歸

聲教之餘彈丸服於域中通八荒於化外青羌黑濮遙
候月以來賓黃支朱鷺畢占風而受吏禹迹之所不至
章步之所未周地無間於華夷治獨超乎今古不有盛
製曷彰丕圖粵若帝王受天命以建國皆有載籍志地
理以貽謀於虞有禹貢之書在周有職方之典方冊所
載若管氏地員呂覽有始百家之傳說不同館閣所修
若元和郡縣開寶圖經一代之典章可考寰宇記之作
於宋畧有未明大統志之述於元泛而失實肆我聖祖

嘗命儒臣雖采錄之有餘尚編輯之未既時如有待事
豈偶然恭惟皇帝陛下聰明首物神聖自天膺歷數以在
躬收政權而獨運光昭祖武弘迓天休凡聖賢經世之
圖咸留睿覽於祖宗待成之志尤軫宸衷謂此輿地之
書關係甚大特詔文學之士纂述是司授成命於九重
考遺編於千古上自聖經賢傳下及水志山經發中秘
之所藏萃外史之道掌遍閱累朝之史旁蒐百氏之言
與夫羽陵宛委竒文汲冢酉陽逸典玄詮梵藏小說方

言靡不網羅舉皆蒐采綴貫羣籍約為成書義類凡例
悉有據依信疑是非壹加訂正首辨方州之域次推星
野之分建置有革有因疆界或分或合如水自源而徂
委如木由榦而分枝山川形勝之殊風俗物產之異巨
細不遺公署學校之類宮室關梁之倫古今俱載留則
民愛去則民慕宦蹟非循良不書出而道行處而道明
人物惟名賢是取非徒儒道而二氏兼收不獨華風而
四夷亦附所以廣聖道之咸容示皇威之無外比之前

志允謂全書綱舉而目張有倫有要事增而文省不泛
不疎海內廣輪如指掌而斯見天下險易不出戶而可
知自有地志未之前聞宜並聖經垂之後代此誠皇上
繼志述事之孝卓冠乎百王高出乎千古者也臣等董
句腐儒草茅賤士叨蒙拔擢豈能如楚左史之讀九丘
忝効編摩竊自比晉司空之創六體莫能稱詔深虞玩
愒之尤幸覩就編少助清閒之學關書同文車同軌大
一統而四海嚮方天為蓋地為輿中關間而萬世永賴

進歷代通鑑纂要表 李東陽

臣某等恭承先帝勅旨纂修歷代通鑑纂要今已成書
謹奉上進者臣東陽誠惶誠恐稽首頓首上言伏以世
有古今史冊鑒興衰之迹聖無先後文章昭作述之光
事或因舊以為新體則似輕而實重司存纂輯道切規
箴寧辭寸晷之多圖効萬分之一洪惟孝宗建天明道
誠純中正聖文神武至仁大德敬皇帝陛下德運堯天
聖躋湯敬求多聞於古訓發渙命於羣臣謂先儒綱目

之書本明正統顧上古帝皇之世未粹成編下逮宋元
尤多卷帙盈箱充棟實繁四庫之藏旰食宵衣豈有三
餘之暇親分義例預錫名稱寒暄閱二載之期朱黑更
數人之手攀龍髯而莫逮撫蠹簡以增悲不敏是慙無
功可錄茲蓋伏遇皇帝陛下英明出類剛健居中上同
舜哲之重華下軼啓賢之繼道實錄方修於金匱餘功
載續於汗青非徒撮要以刪繁抑亦要終而原始政必
稽其得失行必著其忠邪詞雖省而事已該人既往而

言獨在博采諸家之斷略致品評間陳一得之愚代為
講說法多從舊理貴折衷不求敵力於難知務期開卷
而有益肇呈首快進讀經緯漸底終篇告成寢廟臣等
或躬承神授或續奉宸音心微河嶽之涓塵識陋海天
之蠡管治鑑開英皇館局而成於神宗之朝政要本貞
觀君臣乃輯於開元之世矧茲庸劣詎免稽遲幸惟往
責之粗償敢詫前時之未有伏願聖不自聖益弘作聖
之功新又日新茂著知新之效考治亂存亡之故為賞

刑黜陟之規主善為師豈謂借才於異代建中制事用
能垂裕於後昆謹以所修歷代通鑑纂要九十二卷目
錄凡例一卷共六十冊隨表上進以聞

重進大明會典表

李東陽

伏以有謨訓以貽子孫垂萬世之燕翼觀會通以行典
禮昭百世之鴻規蓋非天子則不考文然惟孝者為善
繼志粵自結繩政代契託書傳象魏法陳理同家喻制
備於周官之後經傳於秦火之餘漢模略定乎三章唐

式僅頒乎六典大典垂於宋而光嶽弗完經世紀於元
而彛倫攸斲當天心之厭亂屬聖主之開基峻德神功
彌綸宇宙宏綱大法敷賁臣民文皇紹統於昌期列聖
承休於奕葉政由俗革道與治同中間或斟酌以隨時
大抵皆後先而合節顧夫簡編穰浩條貫繁多披宿儒
老吏亦不暇詳豈僻壤遐隅之所能徧故博學貴乎知
要必會極然後歸極欲圖文獻之足徵須及典刑之尚
有昔我孝皇之志實惟英廟之遺上邇累朝仰稽烈祖

謂一代之制在諸司職掌之書或更定於暮齡或增修於繼世發石室金滕之秘徵兩京百府之藏儀文每據乎舊章義例特施乎宸斷命官分局開六館以編摩類事歸曹備百年之損益蓋自洪武戊申之歲迄於弘治壬戌之秋既挈領以提綱亦刪繁而就簡體之重者雖微必錄令之善者雖寢亦書庶幾愛禮以存羊非敢按圖而索駿文取達而不勝乎質信可傳而寧闕其疑制異典墳宜於今而不泥於古法殊紀傳叙其事而不錄

其名標題榮華袞之褒序簡煥雲章之錫告成雖久刊
布未遑恭惟皇帝陛下煥有堯文緝熙湯學兵民利弊
以次罷行禮樂章程悉加釐革特令臣等重訂是編當
卷帙之粗成荷奎文之載賜獻諸天府副在有司期言
之必有可行俾習矣而無不察譬則麗空之宿一舉首
而在目中合轍之車不出戶而通天下臣等才輕襪線
識小甕天功不厭詳貫惟仍舊拂塵掃葉深知校閱之
難測海窺天詎免遺忘之失伏願上念宗祧之重大下

知稼穡之艱難主善為師任賢立政惟一心之克協罔
庶獄之攸兼不愆不忘率祖考憲章於有法可久可大
配乾坤德業於無疆謹以校大明會典一百八十卷合
凡例共一百冊隨表上進以聞

進元史表

宋濂

伏以紀一代以為書史法相沿於遷固考前王之成憲
周家有監於夏殷蓋因已往之廢興堪作將來之法戒
惟元氏之有國本朔漠以造家用兵戈以爭強并部落

者十世逐水草以為食擅雄長於一隅逮至青吉斯之時大會鄂諾河之上始尊位號漸定教條既近取於奈曼復遠攻於回紇渡黃河以蹴西夏踰居庸以瞰中原太宗繼之而金源為墟世祖承之而宋錄遂訖立經陳紀居重馭輕肆宏遠之規模成混一之基業爰及成仁之主見稱願治之君惟祖訓之式遵思孫謀之是遺自茲以降聿號隆平豐亨豫大之言鼓倡於天歷之世離析渙奔之禍馴致於至正之朝嬖幸蠱惑於中權姦蒙

蔽於外漢網祗因於疎濶周網遽至於陵夷風憲皆為
不捕之猫將士盡成反噬之犬由是羣雄角逐九域瓜
分風波徒沸於重演海嶽竟歸於真主

中謝

欽惟皇帝

陛下奉天承運濟世安民建萬世之丕圖紹百王之正
統大明出而爝火息率土生輝迅雷鳴而衆響微鴻音
斯播載念盛衰之故即推忠厚之仁僉言實既亡而名
亦隨亡獨謂國可滅而史不當滅特詔遺逸之士欲求
議論之公文詞勿至於艱深事迹務令於明白苟善惡

瞭然在目庶勸懲有益於人此皆天語之丁寧愈見聖心之廣大於是命翰林學士臣宋濂待制臣王禕儒士臣汪克寬臣胡翰臣宋禧臣陶凱臣陳基臣趙堦臣曾魯臣趙汭臣張文海臣徐尊生臣黃箎臣傅忠臣王錡靡不網羅嚴加搜采恐翫時而愒日每繼晷以焚膏故於五六月之間成此十三朝之史況往牒舛訛之已甚而他書參考之無憑雖竭忠勤難逃疎漏若自元統以後則其載籍無存已遣使而旁求俟續編而上進愧其

才識之有限弗稱三良兼以紀述之未周殊無寸補臣
濂忝司鈞軸幸睹成書信傳信而疑傳疑僅克編摩於
歲月筆則筆而削則削敢言褒貶於春秋仰塵乙夜之
觀期作千秋之鑑所撰元史紀三十八卷志五十三卷
表六卷傳六十二卷目錄二卷通計一百三十萬六千
五百餘字謹繕寫成百二十冊隨表上進以聞

進歷代通鑑纂要表

張邦奇

臣某等伏奉先皇帝勅旨令修歷代通鑑纂要書成進

呈者臣等誠惶誠恐稽首頓首上言道有常經貴諗從
違之實治多異法恒階興替之原顧鑑龜已定於前人
而考卜宜精於今日不觀往轍曷啓前途欽惟皇帝陞
下天挺英資日新聖學率由祖訓繼緒無忝於成康敷
求哲王成功遠期乎堯舜臣等叨陪講幄忝職儒班先
皇不鄙其庸愚明命畀司乎纂述分曹秘閣發冊石渠
窮念豐芑之遺實注情於簡策而涓埃之報敢忽意於
編摩矧慙襪線之才無補衮職之闕庶采前古之迹可

資乙夜之觀爰惕爰兢胥勤胥勵欲備一代之典盡搜百
氏之書自高辛以來史凡十九由故元而上年歷數千
其間編簡之龐葺與夫文辭之棼浩雖專門之士或不
及詳豈萬幾之餘所能悉覽顧事貴得要故泛載於書
契之餘者雖詳或去然道欲無遺則傳文於結繩之上
者雖遠亦書春秋以前本聖經之斷例威烈而下宗綱
目之法程旁逮遼金法遵今史咸臻實錄豈曰傳疑規
模體統之詳尺楮或稽於百代侈剝興隆之故片時可

昉乎萬年昔漢儒說苑之編事非大要唐相金鑿之錄
辭不萬言核實若歐陽容有未闡之旨博洽如司馬不
逃輕信之譏備而不繁約而無悔徧觀列史莫便此書
是皆先皇之克開而有望於陛下之善述者也然制方
雖存乎古用藥則由乎人苟捐網以臨淵雖羨魚而馬
獲伏願慎終於始圖大於微主善為師動止罔愆乎成
憲克念作聖陟降如見乎先皇定命訏謨務俾與治同
道遏惡揚善永期應天時行臣等無任瞻天仰聖激切

屏營之至謹以所修歷代通鑑纂要若干卷隨表上進
以聞

聖駕臨幸太學謝表

林文俊

國子監祭酒臣林文俊等嘉靖十二年三月十三日欽
蒙聖駕臨幸太學謹奉表稱謝者臣等誠懼誠忤稽首
頓首上言伏以典禮更新百代仰大君之有作辟雖臨
幸四方占泰運方隆載舉曠儀聿光舊典懽均朝野慶
洽天人茲蓋伏遇皇帝陛下聖由天縱德與日新彛倫

叙而五典以惇禮樂興而百度咸正況茲首善尤在留
神默契聖心大祛俗見謂孔子稱王本非禮宜正先師
之名陋元人塑像為不經特遵皇祖之制別祠啓聖聿
明父子之倫配食先賢盡去公侯之號禮無僭瀆道益
尊崇顧茲典之鼎新煩至尊以賁重當薄海同文之日
適踐祚一紀之初乃涓令辰爰修盛事六龍捧御遠戾
止於膠庠萬乘執圭親奠釋於先聖崇儒重道稽古誦
經喜溢章縫光流簡冊執豆邊以奔走乃有三氏之子

孫園橋門而聽觀奚止六館之英俊瞻威顏於咫尺奉
法語之丁寧建皇極以敷言斯其至矣觀人文以成化
是之謂乎臣等職忝師儒躬逢盛美幸覩大人之虎變
願先多士以駿奔賜坐而講易書覺叨榮之已過教人
必先忠孝誓圖報於將來伏願配乎天配乎地皇朝綿
一統之圖作之君作之師天子介萬年之壽臣等無任
瞻天仰聖激切屏營之至謹奉表稱謝以聞

明文海卷六十六

欽定四庫全書

明文海卷六十七

餘姚黃宗義編

碑一

勅建歷代帝王廟碑

宋訥

兩儀判而人極立大統建而君道明粵自上古神聖繼
作代天理物以開萬世太平之治故天地以之而位四
時以之而序萬物以之而育大經大本以之而立盛德
相繼傳至於今欽惟聖天子受天明命肇修人紀以建

民極纘皇帝王之正統衍億萬年之洪基稽古定制作
廟京邑以祀歷代帝王重一統也相舊廟地介乎通衢
褻而弗嚴洪武二十一年秋始命改作於欽天山陽越
明年己巳夏五月三日工部尚書臣秦逵奏成功請文
劄石詔臣訥為之記臣忝職胄監懼不敢辭謹拜手稽
首而言曰帝王功德於昭于天宜有清廟以宅神展敬
歷世以來祀典斯闕三皇五帝祭于肆類僅見於周而
堯舜禹湯發迹肇基及所經歷之地或有祠焉遣使致

祭後世有之至於合廟京國歲修享禮古未之聞皇上
定鼎江左治功既成神人洽和禮樂明備凡廟祀之瀆
禮不經諂神非法者一切去之正名定統肇自三皇繼
以五帝曰三王曰兩漢曰唐曰宋曰元受命代興或禪
或繼功相比德相侔列像於庭金玉其相袞冕焜煌聚
精會神咸宅於茲每歲春秋二仲諏日誓士上御宸極
制命大臣齋明承事遵豆靜嘉粢盛豐潔告充告碩神
格洋洋所以推惟本始式昭曠典者至矣三年則命官

奉香帛詣陵寢具儀物以時致享又以昭聖顯靈而示不忘也嗚呼天生民而立之君所以靖亂也康濟天下阜成兆民而登之仁壽之域者皆以奉若天道而已是故前乎三代之官天下者天也後乎三代之家天下者亦天也皇帝王之繼作漢唐宋之迭興以至於元皆能混一寰宇紹正大統以承天休而為民極右之序之不亦宜乎秦晉及隋視其功德不能無愧故黜而不與是可見皇上敦名實重理道崇德報功大公至正之心真

足以度越百王垂憲來世永永無斃謹為之銘曰

惟皇作極克配天地丕昭盛化以正大位皇道而皇帝
道而帝歷夏商周三王迭繼熙熙皞皞同底於治於赫
漢祖寬而有制光武奮興炎靈用熾唐興晉陽遂有神
器太宗重光力行仁義明明有宋其德克類暨於元氏
而亦用乂豐功茂德後先輝賁翼翼新宮有恤而闕貌
像既嚴皇靈斯蒞享祀苾芬儀文孔備陟降在庭神之
攸暨祚我皇明以克永世

黔寧昭靖王廟碑

程本立

有非常之遇而後成非常之功有非常之功而後享非常之報湯之興阿衡聘於莘野周之興尚父載於渭濱曰漢曰唐曰宋有所興必有所遇然而義則君臣親則父子若我大明皇帝之黔寧王者未之有也王姓沐氏諱英字文英鳳陽定遠人八歲而孤遭元末大亂居室燬於兵隨母逃難母亦病歿惇無所歸謁上濠梁上為惻然與孝慈皇后撫之為子賜姓朱氏上即位金陵建

元洪武始詔復王姓王天資忠孝厚重簡嘿雖在髫齡
不樂兒戲年十八為帳前都尉由都尉為廣武衛親軍
指揮使改廣信衛親軍指揮使拜僉大都督府事陞同
知大都督三十有三爵封西平侯授以鐵券賜號開國
輔運推誠宣力武臣階自昭勇將軍鎮國將軍至榮祿
大夫勲為柱國以都尉守京口以指揮使守廣信節制
甌閩以同知大都督填撫關西皆有威惠天下兵馬實
大都督府總之在府七年裁度機務舉無留滯稱上意

馬一從大將南征獨取鉛山下崇安翦陳友定拔閩溪十八寨遂定閩中一從大將北征出古北口獨克灰山全寧嵩州過臚朐河擒元知院李宣俘男女萬口一為征西副將軍總京畿兵伐川藏抵崑崙山俘男女亦萬口馬五千牛羊十三萬闢地數千里一為征西將軍總京畿河南陝西山西諸軍征朶甘之地降其萬戶且實勒戢夷其部落平納琳七站之地擒洮州十八族番酋曰汪舒多爾濟曰鄂溫都爾并其衆二萬獲馬牛羊二

十萬一總陝西兵出和林畧以集乃路自寧夏歷賀蘭山渡流沙擒元國公托和齊元知院按珠俘其全部以歸天下已大定而梁王巴咱爾斡爾密實元之遺孽恃雲南險遠執我信使納我逋逃上命穎國公傅友德為征南將軍王為副將軍率師三十萬討之旌旗蔽江而上自辰沅陸出羅鬼普定普安皆下苗蠻犵狁迎降恐後循格孤山之南出奇兵襲畢節擊可渡河皆克之巴咱爾斡爾密遣其司徒達爾瑪以精兵十萬拒我師於

曲靖王曰彼謂我師罷於深入未有虞心及其無虞心乃可破也於是倍道進師未及白石江忽大霧四塞衝霧及江而止霧霽則兩軍相望達爾瑪大驚以為我師飛至因擁兵陳水上傳征南亟欲濟師王曰未可別遣一軍泝流潛渡出其陳後鳴銅角樹旗幟為疑兵山谷間達爾瑪軍欲亂王乃趣師濟江以猛而善泅者先之長刀蒙盾斫其軍而奪之氣却數里而後敢陳我師既濟整列而鼓砲聲震天地戰數合王縱鐵騎衝其軍遂

大敗之生擒達爾瑪俘甲士二萬馬萬匹死者橫屍十
餘里巴咱爾幹爾密聞達爾瑪敗遁滇池島中先縊其
妃而自飲藥不死投水死之父老爭出金馬山焚香遙
拜以迎王師王入鄯闡城市不易肆收梁王金印并官
府符信圖籍撫其民洪武十四年冬十二月也自秋九
月出師至是百日雲南平分兵下烏撒得七星關以通
畢節畧建昌澂江臨安沅江尋甸楚雄洱海次第皆下
大理城倚點蒼山西洱河為固南詔皮羅閣所築龍首

龍尾二關號險要王自將取之土酋段世聚衆五萬搤
龍關牢不可破王以一軍付裨將夜從間道繞出黠蒼
山後攀木緣崖而上立我旗幟遲明彼軍驚亂王策馬
渡河水及馬腹將士隨之斬關而入彼軍腹背受敵遂
潰拔其城擒段世脅從者悉縱遣之分軍下鶴慶麗江
收三營砦破石門關畧永昌由是西蕃車里平緬相率
來附雲南平以幅員之廣分烏撒以東越篤以北皆隸
四川餘列為郡邑凡府州縣宣慰司長官司一百八籍

其見戶七萬四千六百設官以治其民立衛以守其地
烏撒東川建昌謀變王還與傅征南合攻下之并克芒
部斬首三萬級獲馬牛羊數萬計王師已東鄯闡諸蠻
部乘之以叛圍城二十萬衆都督馮誠以孤軍固守伏
強弓弩於埤賊近輒射之往往應弦而斃伺賊怠則出
擊之賊不敢即攻城王將銳兵一萬赴援至曲靖遣一
健步懷檄入城約為內應為賊所得詰之賊皆錯愕轉
相告報解圍宵遁王既入城賊散走安寧羅次邵甸富

民晉寧大棋江川諸山猶據險立柵悉分兵殄滅之斬首六萬級生擒四千諸郡復定奏聞上大悅詔傳征南班師王留鎮雲南辨方物以定其貢賦視民數以均其力役踈其節目以寧便其人麓川之外有國曰平緬車里之外有國曰八百媳婦皆請內附在鎮十年得上恩賜悉送官府以助軍資凡遣將討賊者六逋冠集浪穹鶴慶劍川輒相應為亂遣大理衛指揮使鄭祥掩而殲之平緬叛結砦於馬龍他郎甸之摩沙勒遣都指揮使

甯正擊破之斬首千五百級東川蠻據烏路山為砦山極險峻上下三百里遣甯正帥雲南兵與京畿大兵相為犄角討之殺火頭弄宗等五十九人俘男女馬牛羊皆以千計阿資母出降教化三部不供租賦遣臨安衛指揮使王執討平之普安酋密即叛遣貴州都指揮張泰擊破之自將討賊者四廣南特磨道未附自將討之首出降廣西阿赤部叛自將討之誅其酋曰者滿曰矣清俘男女五千口平緬以三十萬衆寇定邊自將二萬

討之與寇對壘以輕騎三百當寇寇出萬衆乘三十象以戰一戰而殺寇數百人獲一象以還王曰吾知賊不足破也明旦寇集衆驅百象以陣象皆背負攔楯左右以大竹筒置短鎗其中乘以標之勢恃以張王分軍為三馮誠領其前甯正領其左都指揮同知湯昭領其右乃下令曰今日之事有進無退進而捷者一級必盡賞退而斂者一隊必盡戮於是鼓而合刃機發箭鋒星流煙飛雷擊電走象皆驚北寇之勇而力者曰實喇亦殊

死戰我左軍小却王登高望之命左右取左帥之首來
左帥遙見一人拔刀飛騎而下麾衆復前王責戰益急
三軍大呼而鏖不移時寇大敗斬首三萬級俘萬人生
獲四十六象餘象被矢如刺蝟以死渠帥刀斯郎埋亦
被百矢殪象上餘黨走死百無一還自是平緬歲入貢
賦不復反矣阿資復叛自將討之擊於補衝殺獲其衆
殆盡阿資僅以身免方搜捕山間俄有旨諭王還鎮以
前軍僉都督何福為平羗將軍甯正為叅將代領其兵

阿資遣其子詣王降王請於朝立衛越州鎮之遂罷兵
歲較屯田所入增損以為賞罰計遠近墾田至九十七
萬畝以滇池末流淺狹霖雨汎濫瀕池之田不可以稼
乃督萬丁自池口入渠濫川中浚而大之無復水患通
鹽井之利以來商旅選凡民之俊秀與諸酋之子弟入
雲南府學朔望或賜之飲膳歲時或賜之衣服又命行
鄉飲酒禮於學民知尊長養老而興其孝弟矣二十年
十月王入朝上宴之奉天殿賜黃金二百兩白金五千

兩繒綵百鈔為貫凡七萬五千以西南之人安於王也
復歸之鎮初王留鎮之明年哭孝慈皇后三日不食踊
慟幾絕及再鎮之三年哭皇太子號慟失聲飲食為少
一日暴薨二十五年夏六月丁卯也享年四十有八官
僚士庶胥吏卒伍緇黃髻白莫不奔號其門泣語於路
訃至京師上哭之慟不視朝一日自為文遣禮官往祭
命嗣子春奉喪以歸詔發兵護喪出境所過衛府州縣
設祭如禮柩出金馬山送者萬人蠻夷酋長哭之盡哀

喪至自雲南詔封黔寧王謚昭靖三代考皆黔寧王妣
皆黔寧王夫人冬十月庚午以王禮葬江寧縣長泰北
鄉觀音山之原自喪歸至葬上遣使祭者三皇太孫親
王遣使祭者再葬之二日詔春襲西平侯爵嗣鎮雲南
賜白金若干萬兩明年太常以太牢祭王功臣廟而雲
南父老諸酋首合辭願立廟祀王守臣奏請上許可之
又明年廟成父老諸酋首請本立紀王勲德刻諸廟石鳴
呼自宋靖康之亂戎馬蹂中國百五十年而極於元矣

末政墮壞神憤人怒天命我明掃除滯滌永清四海以承大統於是賢豪並出輔成帝業至於西南六詔之地一變而為華夏之俗非斯民之大幸與王之治西南也以威武定其地者功若速而事返易以德化洽其民者事若緩而功則難論者謂唐李西平不特良將乃良相也王其人乎王於濂溪周子之太極圖橫渠張子之西銘西山真氏之大學衍義皆尊信而講明之至以太極圖與晦庵朱子之白鹿洞規刻之於石立之雲南府學

則漢之功臣有所謂木彊少文不學亡術者得不愧於斯乎蓋非聖賢之學無以為大施設之體非將相之才無以為大蘊蓄之用王能體之以聖賢之學用之於將相之才宜其過人遠矣雖然向使王樂生無事之日其所遇所報安能始終若是哉故曰天也夫高莫高於山嶽大莫大於河海本立才劣辭陋消埃奚贊其萬一父老諸酋思之也哀請之也至輒不自揆謹按王行錄述之系之以詩詩曰

上帝有赫降命我明剪凶戡亂以開太平乃授以臣乃
賚以弼龍興雲從日出爝息勇奮其力知角其能焯有
聲烈則惟黔寧黔寧始生生元之末筑筑稚年天其我
割匪曰割之實將啓之惟皇父之維后母之長試以官
帳前都尉廣武廣信指揮兵衛皇曰汝來汝績其凝為
朕腹心為朕股肱朝夕事朕僉大都督繼陞同知累階
榮祿柱國惟勲西平是封建侯襲爵崇德報功鐵券丹
書金匱石室子孫保之世世無斃既平南粵既定西陲

北靖邊庭威行九圍惟彼西南古之六詔元有遺孽阻
我聲教皇曰西平爾副征南役蛇役豨爾劉爾龕樓船
蔽江師三十萬乾旋坤迴山擘濤溪悠悠牂牁我我格
孤羅鬼犵狁我而蘇彼昏不知擁兵曲靖敢逼我師
罔畏天命我師其行如霆如雷大戰白石手縛其魁載
厲我兵載秣我馬直入滇池如裂其瓦元之遺孽破卵
覆巢父老歌舞迎師於郊段世亦擒罔有不服班師振
旅獻俘授馘摩些施順望裸茫河尋傳漢裳婆羅秦婆

烏蠻白蠻東爨西爨穿鼻長髻黑齒綉面麗木金赭朱
提銀流白雉孔雀馴象犀牛一百八區三十六部七十
城門八百媳婦版圖既入職貢是修大開明堂萬國懷
柔皇曰斯民悉朕赤子一視同仁無間遠邇詔汝西平
其撫鎮之以煥其寒以飽其饑西平奉詔稽首以拜夙
夜兢兢罔敢或懈拊摩吹煦於懷之咳芟夷蘊崇于田
之來于羊于狼以膊以磔于稼于苗以膏以澤以興學
校以敦詩書農隙講武鼓舞邊隅滇人有言我亦人類

遠於恩化弱肉強噬今也奚倖昔也奚辜子有其父婦
有其夫滇人有言我枵我羸西平舖我西平總我西平
曰吁茲豈在予維皇之命維皇之謨天胡不仁奪我父
母擗踊而哭匍匐而走九重眷注一日哀聞驚慟輟朝
諭祭以文數備禮登有誄有謚王以黔寧侯以冢嗣黔
寧始薨人莫不哀嗣侯既至人莫不懷江寧之岡有鬱
其兆滇人不忘滇則有廟金馬左立碧雞右昂千萬斯
年以祀我王

鄉飲酒碑 王彝

皇明既一四海乃大興禮樂以新今俗還古道為千萬
世計惟鄉飲酒繇近代以還蔑之有講洪武五年始詔
郡國以孟春孟冬舉行斯禮而讀律焉其時江夏魏公
實守蘇州奉詔惟謹既一再行之然尚恐未能宣上德
意是以明年復叅考儀禮以授經歷李亨教授貢穎之
使與郡士周南老王行徐用誠共商校之且使張端及
諸生相與習焉爰釋菜先聖先師以孟冬之月吉日癸

未行於郡學其大賓為前進士魏俊民介為先聖五十
四世孫思調俱為推官王芳三賓為范廷徵眾賓為邵
允禮錢瓊等十有一人次俱為知吳縣事魯黼知長洲
縣事張其而樂正以張田司正以滕權賢而得其人如
此又特位三老人曰崑山周壽誼年百有十歲曰吳縣
楊茂九十有三歲曰林文友九十有二歲皆形充神完
行坐有禮老人而得其人又如此然後乃列坐八十以
上者十有三人七十以上者六十有二人六十以上者

四十有七人五十立而聽政役者百人凡在位者之子弟侍立者二十有八人主賓僕介之贊相爵尊豆籩俎洗之執事者皆具又別為教授位而吳縣教諭徐鼎崑山教諭陳圭次之訓導十五人又次之長洲教諭周敏則以侍其父南老常熟教諭傅著侍其父玉皆降而北面立合鄉學及六縣弟子員之立者百有六十人文武僚佐之在位觀禮者若干人農工商賈遠近之觀者又以千計公年且七十而朱顏煥如獨出人表升降揖拜

竟日無倦而其子子盤侍立進趨中度如是禮明樂和衆以大悅既而乃讀律衆復肅以聽皆曰今天子神聖援吾人水火中而斯禮也吾身親見之幸哉越五日周老人還崑山公躬出婁門之郊再拜以餞都之士女觀者又慨焉以為幸見且曰公於人之父兄也如父兄然吾於吾父兄宜何如君子以是知公之政興孝興弟者蓋易易然也且老人者生宋景定中歷元百年而遭逢聖代意者天生斯老以待今仁壽固已在百年先矣微

公誰能表之彛也居公之野以病廢得扶曳以觀焉蓋
曠世之遭也故為銘其堂下碑曰

於維皇王正此方夏奚釋戎衣有事郊社祀享朝會禮
作樂造神人既和及鄉飲酒維鄉飲酒萬方攸同俾孝
與義載臻時雍顯顯魏公牧我蘇人公有旨酒樂我嘉
賓嘉賓戾止以俱以介公在泮宮賓至則拜出俎東壁
羞自東房玄酒於尊房戶是當有勺有勺實彼爵矣再
拜稽首獻且酢矣吹笙鼓琴而瑟而簫而間以歌厥音

猶猶有黃其髮台背兒齒百有十歲眉壽曷已公拜而饋實猶父兄何以將之篚有玄黃賓既樂只言旋言歸醉飽自公祝公期頤我子我孫公之孫子公我父兄我孝我弟公曰咈哉天子明聖天子萬年畜爾子姓猗嗟蘇人今爾復古我作歌詩以告來世題名縉紳

仗錫禪寺紀績碑烏斯道

古之逃空虛者必靈境真區擇而居焉至山水之氣闕而不泄神呵鬼禁人不能迹而見者尤為佛氏所專若

仗錫寺是已其地南去郡治可二百里山深入萬壑中
蛇盤斗折而上重巒疊嶽峭峻際天勝槩絕世至峯頂
頂圩而爽塏可廬清流散飛灌木層翠晴必沾潤暑必
挾纒雖樵者靡常至四際又有峯二百八十有一回合
起伏雲霞蔽虧內七峯尤瑰異郡諸山咸莫之抗唐龍
紀元有石霜下長政二尊宿在藤湖肇基於此寺建徒
集天祐三年吳王錢氏賜今額十傳迨宋之天聖四年
太白己禪師德隆名重足以開先裕後又尊之為第一

代祖寶元二年額加延勝繼茲席者類多碩德雲栖霧
食燈傳香衍寶東南之望刹也歷歲滋久寺或燬或復
傳五十二代遭時孔艱窘於徭役費如丘山貲產垂罄
僧日竄匿寺日摧毀至仁讓公負荷法任痛念諸祖創
業之難倡道不匱苟不攢本枝葉以亡雖有智力者出
求興復如故惡可得哉於是殫心瘁容躬走官府招亡
植壞保守先業於綱紀糜爛之後甫七歲珠環壁合俾
圓頂方袍之士不缺望今住山起予公又力繼遺緒篤

揚前休謁章蟾書走永新請於予曰寺舊有顛末載諸樂石以灾而不存茲不紀述則建初之績圖存之功咸泯滅無傳敢辱先生之文明始顯今以貽厥後余謂昔諸祖必處夫高深靜僻地者蓋以明心繕性非遠紛去譁一耳目之官不可也若茲山者豈易致基業豈易圖哉自佛法入中國法有阻行寺有興廢莫有常者元運既圯天下大弗靖寺悉廢於兵燹吾郡幸無恙而廢於艱難者又十九焉茲仗錫禪寺將絕而復振雖諸祖之

願力深重亦讓予二公之力也以世間相論之寺有興有廢以正法眼眎之寺未嘗有興廢也然不有世間相何以明正法眼哉自茲以往比主是山者鑒往懲來使是寺益以永久得以考鐘伐鼓大宏講席以正羣妄則其功德又豈忝於諸祖也耶寺之棟宇土田與夫山所入之利具刻諸碑陰繫以詩曰

東南之山維明為盛維明之山仗錫為勝高設於天闕司於神其在玄右豫埃哲人哲人伊誰張於佛氏藤湖

之長太白之已有廓其址有歸其廬建業之始倡道之
初名聞雷厲學徒雲集繼茲席者代踰五十匪山之靈
胡底於成匪祖之聖胡底於寧元運之末根柢幾絕讓
予者出式茂其蘖以隆於俶斯永其傳克懋於後斯昭
其先伐鼓考鐘環居列食心祖之心庶幾朝夕有章有
程有聲有輝俾四方士惟茲焉是歸

大寧觀碑

劉定之

大寧觀在大同府城中大同古雲中地漢高祖鋤秦蹶

項威振寰海然至此為冒頓所困拓跋魏據此而起而
以得中原之半遼金皆以此為別京元因之立宗廟置
社稷焉維我皇明視為藩垣重地屯兵千萬連城堡十
數百以控制朔漠達於無外蓋自帝都顧視之大同其
右翼也德威所及之遠豈前代居中夏控外邊者可侔
哉信足謂之大寧矣洪武初創道觀以大寧為名厥有
意焉然其地寒故山林無傑木鉅材其人勞於戍守饋
運征行故於取木伐石陶壁之役有不暇構架塗墁繪

飾之巧有非素習則維王公將帥官府解署有不逮中
土者况於觀固宜因陋就簡也今副都御史右濬王公
越來鎮大同會肅法舉亦既有年意欲新之有待未果
太守緩德郝君淵之自監察御史知河間府連著績用
遷綰郡紱有所興革克承憲度公嘉獎之以新觀之事
委焉君退與其僚捐俸為率俾觀之羽士張道維集好
義者所願輸始事於成化三年丁亥某月訖工於明年
戊子某月最北正殿五間殿之南甬道屬於中殿三間

道東西各有亭中殿之南甬道屬於山門道東有鼓樓
西有鐘樓環其區域為廊四周東廊二殿北以祀三官
南以祀靈官西廊二殿北以祀四聖南以祀關公間架
高廣深遠如其數觚稜罍欄檻增其明香火洒掃朝
夕節朔定其制石山藝卉沙墀植樹期其久既成文武
官曹兵民士女咸集瞻視靡不欣喜謂曩者吾人至於
斯觀有所祈謝祥臻災弭寇殄物阜雖感神惠而愧觀
弗稱今茲稱矣功有自焉惟亭立碑以待刻文紀實郝

君嘗從予學乃以王公命來請予文夫斯地之安寧綏
靜陶大化超往古由有聖主在上享天心恢神謨以長
轡遐馭也斯觀之盛則賢臣總風紀任牧守治神人能
得其宜於中也然則斯人在下衣食有餘而奉神之休
庸有既乎予既記其事乃繫以銘詩曰

絕塞之表不聞刁斗乃聞道觀鼉鳴鯨吼鼓鐘之聲警
於昏曉烽燧不見乃見華燈夜集於觀煜煜如星我皇
御世武緯文經天下之大孰如其寧風調雨順禾黍被

野日之夕矣牛羊來下饗殮是宜湏酪亦諳出而射獵
獲虎耽耽歸舉兕觥抵掌醺酣囊金車帛來自塞南家
給人足捐財弗貪以作斯觀千楹榭楠維神之尊其居
王宇垂衣雲霞寶冠玉塵與天為徒祐我聖主旁殿居
者哂喜瞋怒各司厥職我民依怙爾驕勿驕神欲勦之
都憲節出大將燾麾執以還城往觀數停入門而左關
雲長居顏如渥赭有虬其須單刀雪瑩狂魄先誅有訖
者亭碑峙龜趺守臣所立鰲島仙書

勅修河道功完之碑

徐有貞

惟景泰紀元之四年冬十月十有一日天子以河決沙
灣久弗克治集左右丞弼暨百執事之臣於文淵閣議
舉可以治水者僉以臣有貞應詔乃錫璽書命之行天
子若曰咨爾有貞惟河決於今年東方之民厄於昏
墊勞於堙築靡有寧居既屢遣治而弗即功轉漕道阻
國計是虞朕甚憂之茲以命爾爾其往治欽哉臣有貞
祇承惟謹既至乃奉揚明命戒吏飭工撫用士衆咨詢

羣策率興厥事已乃周爰巡行自東北徂南西踰濟汶沿衛及沁循大河道濮范以還既究厥源流因度地行水乃上陳於天子曰臣聞凡平水土其要在知天時地利人事而已天時既經地利既緯而人事於是乎盡且夫水之為性可順焉以導不可逆焉以堙禹之行水行所無事用此道也今勢反是治所以難蓋河自雍而豫出險固而之夷斥其水之勢既肆又由豫而兗土益踈水益肆而沙灣之東所謂大洪之口者適當其衝於是

決焉而奪濟汶入海之路以去諸水從之而洩隄以潰
渠以淤澇則溢旱則涸此漕途所為阻者與然欲驟而
堙焉則不可故潰者益潰淤者益淤而莫之捄也今欲
捄之請先䟽其水水勢平乃治其決決止乃濬其淤因
為之方以時節宣俾無溢涸之患必如是而後有成制
曰可臣有貞乃經營焉作治水之閘䟽水之渠渠起張
秋金隄之首西南行九里而至濮陽之灤九里而至博
陵之陂又六里而至壽張之沙河又八里而至東西影

塘又十有五里而至白嶺之灣又三里而至李峯之崖
由李峯而上又二十里而至竹口蓮花之池又三十里
而至大瀦之潭乃踰范暨濮又上而西北數百里經澶
淵以接河沁河沁之水過則害微則利故過其過而導
其微用平水勢既成名其渠曰廣濟閘曰通源渠有分
合而閘有上下凡河流之旁出而不順者則堰之堰有
九長袤皆至丈萬九堰既設其水遂不東衝沙灣乃更
北出以濟漕渠之涸阿西郵東曹南鄆北之地出沮洳

而資灌溉者為頃百數十萬行旅既便居民既安有貞
知事可集乃叅綜古法擇其善而為之加神用焉爰作
大堰其上楗以水門其下繚以虹隄堰之崇三十有六
尺其厚什之長伯之門之廣三十有六丈厚倍之隄之
厚如門崇如堰而長倍之架濤截流柵木絡竹實之石
而鍵之鐵蓋合土木火金而一之用平水性既乃導汶
泗之源而出諸川匯澶濮之流而納諸澤遂濬漕渠由
沙灣而北至於臨清凡二百四十里南至於濟寧凡二

百一十里復作放水之閘於東昌之龍灣魏灣凡八為水之度其盈過丈則放而洩之皆通右河以入於海上制其源下放其流既有所節且有所宣用平水道由是水害以除水利以興初議者多難其事至欲棄渠弗治而由河沁及海以漕然卒不可行也時又有發京軍䟽河之議有貞力奏蠲瀕河州縣之民馬牧庸役而專事河防以省軍費紓民力天子從之是役也凡用人工聚而間役者四萬五千有奇分而常役者萬三千有奇用

木大小之材九萬六千有奇用竹以竿計倍木之數用鐵為斤十有二萬錠三千緡百八釜二千八百有奇用麻百萬荆倍之藁秸又倍之而用石若土則不計其算然其用糧於官以石計僅五萬而止焉蓋自始告祭興工至於工畢凡五百五十有五日是水官佐工部主事臣詡叅議山東布政使司臣雲鵬僉山東按察司事臣蘭等咸以為惟水之治自古為難矧茲地當兩京之中天下之轉輸貢賦所由以達使終弗治其為患孰大

焉夫白之渠以溉不以漕鄭之渠以漕不以貢而工皆
繫年費皆鉅億若武之瓠子不以溉不以漕又不以貢
而役久弗成兵民俱敝至躬勞萬乘投璧馬顛神祇而
後已以彼視此孰輕孰重孰難孰易乃今役不再期費
不重科以溉焉以漕焉以貢焉無弗便者是於軍國之
計生民之資大矣厚矣其可以無紀述於來世臣有貞
曰凡此成功實惟我聖天子之致所以俾臣之克效不
奪浮議非天子之至明孰恃焉所以俾民之克寧不苦

重役非天子之至仁孰賴焉有貞之於臣職其惟弗稱
是懼矧敢貪天之功惟夫至明至仁之德不可以弗紀
也臣有貞嘗備員翰林國史身親承乏不可以嫌故自
輟乃拜手稽首而為之文曰

皇奠九有歷年維久延天之祐既豫而豐有部以蒙見
沫日中陽九百六數丁厥鞠龍虵起陸水失其行河決
東平漕渠以傾否泰相乘運維中興殷憂迺凝天子曰
吁是任在予予可弗圖圖之孔亟歲行七易曾靡底績

王會在茲國賦在茲民便在茲孰其幹濟其為予治去
害而利惟汝有貞勉為朕行便宜是經臣拜受命朝儼
夕儆將事惟敬載驅載馳載詢載謀載度以為乃分厥
勢乃隄厥潰乃踈厥滯分者既順隄者既定踈者既濬
乃作水門鍵制其根河防永存有埽如龍有堰如虹護
之重重水性斯從水利斯通水道斯同以漕以貢以莫
不用邦計維重惟天子明浮議弗行功是用成惟天子
仁加惠東民民是用寧臣拜稽首天子萬壽仁明是懋

爰紀厥實勒茲貞石昭示無極

海寧縣障海塘碑

張寧

海寧古鹽官縣瀕海南上有山名赭赭南遠有山對峙如門是為浙江受潮之口歲久汧洄溇瀆涖出渾若階則口隘潮東反擊於鹽官隈岸宋嘉定中潮汐衝鹽官平野二十餘里史謂海失故道有繇也成化十三年二月海寧縣潮水橫溢衝圯隄塘逼盪城邑轉盼曳趾頃一決數仞祠廟廬舍器物淪陷畧盡郭不及者半里

軍民翹喘奔籲皆重足以待縣上其事於府府守陳上其事於欽差鎮守太監李巡按監察御史侶二公以所上事詢諸三司布政司杜按察使司楊又以二公命各詢其佐叅政李副使端叅議盧僉事梁咸集厥地周視翁謀區畫會計相與祭於神具以成業托分巡僉事錢曰君宜任重有所給乏從革惟君自處公乃躬履原隰量材度宜命杭湖嘉興官屬因地順民採石於臨平安吉諸山物用林積舟楫轉挽蔽河而至分命把總指揮

李通判何兼總工役初用漢犍鉅法不就乃斷木為大櫃編竹為長落引而下之汎濫稍定人知有成勢皆奮趨事計以日費致月工填壘稠復為力漸易業可待就時盛夏公有念曰我聞聖禹治水奏鮮定賦非但䟽泄而已今民蕩析未寧農稼方作饑勞野聚必有疾疫未可亟也繇是作治雖巖間輒撫循勞來失次者徒寓空舍惠以薪米大集醫藥以療病者作副隄十里衛灌河以防泄鹵之害義聲倡道富人爭自振施民至是始忘

死徙之念歲八月塘成適沙塗壅障其外公因增高培厚覆實擣虛使腹抗背負屹成巨防而海復故道矣是冬舉羨餘之財修葺文廟增廣學地重建按察分司致祭告成公乃復邑父老過相語曰昔元延祐海患財力大艱時官謀寡誣以異術今之深沙鐵神遺跡近在吾少歲猶見大父行於悒流涕而道其苦辛者皇朝永樂九年海決有司不時治民流移者六千七百餘戶淪田一千九百餘頃事聞遣保定侯孟英等力役蘇湖九郡

貲累鉅萬積有十三載其患始息此吾輩耳目所及者
今錢公以一騎行邑斂不及民勞不縻衆徒以三府萬
二千人僅七越月而績用聿成患大費省力少効速較
之前事孰與此賢方首事之際振撼倉惶若遇勅敵雖
有優才絕力當亦不暇旁顧公能發心蘊竭性能紓徐
委曲以庇食我以調劑我以成我稼穡以寧我婦子凡
吾輩今日得以復安此土者皆公賜也奈之何泯沒其
德遂相率叩縣令孫綱教諭彭永烈介予友醫官邵暹

庠生凌雲翔徐寬具書幣走徵予文刻石予念風波漲
溢凡際海之區無不間遇至於衝決激射惟浙江地勢
為常自延祐及今纔百五十年海已三變雖曰氣數消
長未嘗不以人力定勝但恐物非天成終當復故使赭
山之渾復出沙塗之壅再去後之繼任非人文獻無考
則父老前日之憂將或在其子孫也文章非紀實不足
以傳信請詳述本末凡有事者皆刻之碑陰一以示今
日之功一以示後世之法

重修海鹽縣儒學碑

張寧

海鹽縣自宋建學至國朝凡十一遷修歲月滋久典守靡常殘毀傾摧幾不可依息者非一日矣成化庚寅郡大夫方欲修舉會監察御史劉珂叅政甯良僉事周正方行部視學顧瞻不遑詢簡通判鄭昇委以創述之事鄭素廉濟承命惟謹盡撤敝餘易以栢木中立明倫堂南徙中門北徙後堂東建復禮齋西建由義齋西北隅為饌堂東北廩庾肆舍在西際南上廨宇在東際北上

復宣公祠於廟東仍文昌祠於廟西重門翼廡垣屏周
肅左殿右堂廟學均稱自經始至告成僅八越月而吾
邑之士遂復有所歸矣嗟夫學校者士之家也人而無
家則無所於歸其適也將惟遇而止撫世者知其然必
先為之地陶以禮樂期以科目待以祿位使有定詣所
以收天下之材而一其歸也當周盛時鄉國有學賓選
以時德行道藝天下皆若人焉及其衰微以至戰國王
政不行庠序廢熄士始變故求通放為游說騫為戰爭

流為異端聚為食客波流風靡智藏耄遜而莫之振皆由乎士之無歸也汎濫浮蕩及乎嬴秦厭苦縱橫之術一切焚書坑儒專尚法令士之所學益無嚮用絕於授受或就耨耨或附刀筆或迫為卒伍或因為屠庸苟避時禁不復審義一旦倡謀起事由其智力相並動足致人大約皆出乎無歸之士使其初不務除絕而務反古以居之則跋扈踰閑者固皆曩時之宿興賢能也何至乎空國而速亡哉漢唐以下學校僅舉科目多岐士之

功業與時相平因循遷合沿及五季儒者之門戶蕩然
矣天啓人文誕敷宋治三百年來未嘗一日亡養士之
地其後國步雖艱學治不廢官曹或素士論常存建炎
德祐之際天運改屬人心不移雖有外圖卒無內叛扶
持迂續百有餘年而仗節死義與國終始者率多學校
之士蓋由其養用兼隆安危相倚士至是則又以國為
家以死為歸不特不他適而已也嗟夫秦宋之國勢強
弱不倫而其廢興失得之故乃爾士果可使之久無所

歸也哉恭惟聖明繼周邁宋學校遍於海內所以陶養
期待乎士者舉天下而一之無所不用其極海鹽雖地
薄民聚居無厚資然比之疇昔人皆安土樂文俗尚明
達風化日臻而不可動以非義者學與士之效也諸君
子以士入官仰體聖意用能舉弊起廢使吾黨大康其
家而終為吉士之歸是豈獨一州之美雖達諸天下可
以善政稱矣寧故弟子員也舊家有光深復自慶因紀
叙其事而刻諸石凡我同志盍歸乎來

明文海卷六十七